

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

28 Décembre 2018

20 Rabi'ul Aakhir 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « *Kot nous bane valeurs lontan fine aller ?* ».

Azordi nous pé vive dans ene l'épok kot bane valeurs d'antan (bane valeurs lontan) fine quaziman disparette. Astaire là, népli ena kit respé pour bane ki pli grand ! Par exemple, lontan, bane professeurs ti ena ene grand valeur, ene valeur inestimable auprès de zot bane zélèves, mais de nos jours sa valeur là fine perdi, fine disparaite. Bane parents zot incapables pou contrôle zot bane zenfants malgré tous bane discours et sermons de bane chefs de bane religions, malgré le travail de bane ONG et bane conseils de bane psychologues. Malgré tous bane zéfforts, la situation pas pé améliorer. Nous pé vive dans ene société en plein mutation, en plein changement. Avec la globalisation, nous pé laisse nous emporter par le courant de la modernisation ki pé éloigne nous de nous valeurs d'antan.

Sa nouvo génération là pé nek suivre l'évolution de la société. Lontan, bane l'écoles, bane Madrasas, aussi bien ki bane parents ti pé zoué parfaitement zot rôle pour maintenir ene l'équilibre entre bane valeurs morales et bane l'effets

néfastes de la modernisation. Mais de nos jours, bane parents fine perdi zot l'autorité lor zot bane z'enfants. La plupart de bane zenfants népli obéir à zot bane parents.

Kifaire donc nous bane jeunes zot dépourvus de bane valeurs morales ? Eski c'est à cause ene faille dans nous système éducatif ? Eski nous pé robotize nous bane jeunes par le biyé de la haute technologie ? La politesse et la courtoisie zot presque inexistantes kot bane jeunes. Kot sa bane salutations lontan là fine passer, bane tels salutations ki ti pé sorti dépi profond les cœurs, rempli avec l'amour et l'amitié ?

Alors, ki sanlà à blâmer ? Sa pas pou servi nous à nannié pou zette tort là lor ene seul dimoune ou ene sel entité parski tous bane parties zot à blâmer. Bane parents, le noyau central de la famille fine perdi zot connexion avec zot bane zenfants. Azordi, tout est permis pour bane zenfants. Na pas ena restrictions. Que ce soit papa là et mama là, les deux travaille et bane zenfants zot livré à zot-mêmes, sans ene guidance et ene bon discipline. Maintenant, dans ene lémonde hautement technologique, la logique d'antan ki ti faire l'unité familiale primer fine laisse place à ene connexion mondiale avec tous genres de bane individus. Quoi-ki la technologie apporte certains avantages, mais malheureusement nous ena affaire de nos jours à so bane multiples désavantages aussi, bane tels z'affaires ki ruine la santé physique, morale et spirituel de bane zenfants.

Lontan, malgré bane inconvénients de la pauvreté, l'entente entre bane membres de la famille ti toujours cordiale. Le soir nous ti pé assisé autour d'ene sel la table pour diner. La lampe à pétrole ti ene élément essentiel pour le maintien de l'unité au sein de la famille. Malheureusement de nos jours, sa l'unité là li quasi inexistant. La communication entre parents et zenfants fine vine bien bref ; na pas ena même si bien guetter, et si ena li, na pas ena li assez !

Vol avec violence, bane crimes atroces, l'alcolisme et la drogue fine prend ene bien grand part de l'ensemble de nous la vie de tous les jours et de nous société actuelle. Lontan malgré la pauvreté, nous ti pé vive en harmonie au sein de la communauté. Le respect mutuel entre bane voisins ti pé contribuer à créer ene l'environnement sain et paisible. Bane dirigeants de bane l'associations culturelles ti bane dimounes honnêtes (intègres) et bane vrais modèles de références.

Couma sa parole là dire : *l'exemple bizin vine d'en haut*. Mais la situation li complexe et difficile azordi. La corruption fine gangrène nous société. Le soif d'argent fine pousse bane dimounes pou recherche bane tels travaux ki pou amène bocou l'argent afin pou améliore zot coût de la vie, mais malheureusement, c'est bane zenfants ki fine paye les pots cassés. L'abandon affectif de bane parents, ainsi ki l'absence de zot létemps et guidance entraîne bane zenfants dans bane chemins obscures, tels couma la drogue synthétique ki pé faire ene ravage partout, pé détruire zot la vie.

Eski li toujours possible pou inculquer bane bons manières, le respect et le bon comportement dans bane jeunes azordi ? La communication entre parents et zenfants concernant le mode de vie d'autrefois pou capave plus au moins donne ene leçon à bane jeunes en termes de respect mutuel. *Insha-Allah*, et sa bizin être accompagné d'ene bon l'éducation spirituel aussi, ki pou renforcé la valeur morale et spirituel de bane zenfants et pou donne zot l'aptitude et l'amour pour recherche zot Bondié (Allah), Le Tout Puissant à travers la prière, ene bon comportement et l'accomplissement de bane bons actions.

Le prophète de l'islam, Hazrat Muhammad (saws) fine mette l'accent lors le bon comportement. Ainsi, le bon comportement pou pèse lourd dans nous balance le jour du jugement dernier. Li (saws) fine même dire: « *Le meilleur parmi zot c'est celui ki ena ene bon comportement* ». (Bukhari). Fine aussi rapporté dans ene l'autre hadith : « *En vérité, bane croyants ki plus complets dans la foi c'est bane ki ena le meilleur caractère et ki pli gentils envers zot familles.* » (Tirmidhi).

Le Messenger d'Allah (saws) fine être envoyé pour parfaire le meilleur comportement. Donc, nous bizin vine bane dimounes responsables et suivre bane pas de nous prophète, car c'est en pratiquant so *Sunnah* et en encourageant nous bane zenfants pou faire pareil ki la société actuelle pou retrouve so l'équilibre. *Insha-Allah*.